



09.november.2017

UKA2017/34

Inatsisartut suleriaasianni § 36 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara:

Pisortat allaffeqarfiini siunertaasutut oqaatsit ataasiinnaat atorneqalernissaannut suut aporfiusinnaasut pillugit apeqquteqaat aallaavigalugu oqallinnissamik siunnersuut.
(Inatsisartunut ilaasortaq, Vivian Motzfeldt, Siumut)

Pisortat allaffeqarfiini oqaatsit ataasiinnaat aallaavigalugit ingerlatsilernissamut aporfiusinnaasut suunersut Vivian Motzfeldt-tip oqallisissiaanut Partii Naleqqamiit qujavugut, Naalakkersuisullu akissutaannut, imatullu oqaaseqarfiggissavagut.

Partii Naleqqamiit anguniakkatta ilagilluinnarpaat Pisortat allaffeqarfiini aammalu Inatsisartut ataatsimiittarfiani oqaluttarfianilu oqaatsit ataasiinnaat aallaavigalugit ingerlatsisoqalissasoq, tassanilu pineqarput kalaallit ilitsoqqussaralugu oqaasii.

Naligiinnerulernissaq Partii Naleqqamiit anguniakkatta aamma ilagimmagu taannalu soppassuarnik isumaqartipparput soorlu Qallunaat Inatsisartuisa ataatsimiittarfiani oqaluttarfianilu, aammalu Savalimmiormiut Inatsisartuisa ataatsimiittarfiani oqaluttarfianilu namminneq oqaatsitik atoraat allanik akoornagit, tamanna aamma uagut pisinnaatitaaffigisariaqarparput.

Assersuut: una ersarissaq taasinnaavarput Inatsisartunut oqaluuserisassanngortitsissagutta qallunaatuunngorsinnaanngippata tiguneqarsinnaanngillat sooq taamaassava ?

Kalaallit Nunaanni Namminersorneq Pillugu Inatsit. Kapitali 7, Oqaatsit, § 20. Kalaallit Oqaasii Tassaapput Kalaallit Nunaanni Pisortatigoortumik Oqaatsit.

Ukualu oqaaseqatigiit saniatigut ikkunneqarsimasut: issuaalaarpunga.

“Tamatuma saniatigut aalajangersarneqarpoq danskit oqaasii pisortatigut atorneqarsinnaasut, aammalu tuluit oqaasii allamiullu oqaasii allat pisariaqartitsineq malillugu atorneqarsinnaasut”

Taakkualu saniatigut ikkunneqarsimasut piffissamik killiliilluni peerneqarnissaat aaliangiunneqartariaqalerpoq.

Taamatullu piumasaqaateqarneq allamiuluarnermik tunngaveqanngilaq aamma tassunga sangutinniarneqassanngilaq, naligiinnerulernissamilliuna tungaveqartoq soorlu danskinut savalimmiormiunullu.

Soorluttaaq oqallisissiamik qaqitsisup tungavilersuutimini eqqaagaa inuiaqatigiit taamak ikitsigaluta allaffissornermut aningaasarpassuit atorneqartartut, amerlassutsitsinnut sippulerujussuarnik aningaasanik atuiffigisatinnik.

Kalaallisuumullu iliniutinik sulissutiginnittoqartariaqarpoq aammalu iliniartsitsisoqartariaqarpoq pimoorussamik, tassa aqqutissiussisoqartariaqarpoq.

Taamatut angusaqarsinnaagutta nukippassuit aammalu aningaasarpassuit sipaassagaluarpagut sukanerusumillu siumukalerluta, marloqiusamik pingasoqiusamillu ingerlatsiunnaarluta imminullu allanillu nikassarneqarunnaarluta nalelersorneqarunnaarlutalu uparuartorneqarunnaarluta taamaallaat immitsinnut nalilersinnaanngorluta.

Una oqallisissiaq imaannaanngitsoq, Taamatut oqaaseqarfigalugu qujavugut.

Henrik Fleischer